



La gulivaziun naziunala da finanzas

Per rinforzar il federalissem



Schweizerische Eidgenossenschaft
Confédération suisse
Confederazione Svizzera
Confederaziun svizra

Departament federal da finanzas DFF
Administraziun federala da finanzas AFF

Cuntegn

1 La gulivaziun naziunala da finanzas – per rinforzar il federalissem	4
2 Las pitgas principales da la gulivaziun naziunala da finanzas	5
2.1 Tge signifitga la repartiziun da las incumbensas tranter la Confederaziun ed ils chantuns?	7
2.2 Co funcziuna la gulivaziun da finanzas en in senn pli stretg?	9
2.2.1 Gulivaziun da resursas: redistribuziun da resursas finanzialas	10
2.2.2 Cumpensaziun da grevezzas: contribuziuns per grevezzas spezialas	13
2.2.3 Cumpensaziun limitada d'inequalitat: contribuziuns durant la perioda transitorica	15
2.3 Il percursor da las finanzas en ils trais sistems da gulivaziun	16
3 L'effect durant ils emprims onns	18
Contact	19

La gulivaziun naziunala da finanzas – per rinforzar il federalissem


La gulivaziun naziunala da finanzas regla las relaziuns finanzialas tranter la Confederaziun ed ils chantuns. Ella fixescha per l'ina la repartizion da las incumbensas publicas e per l'autra la redistribuziun dals daners publics tranter la Confederaziun ed ils chantuns. La gulivaziun naziunala da finanzas ha duas finamiras principales: da reducir las differenzas pertutgant la forza finanziala dals chantuns e da realisar las incumbensas statalas cun dapli effizienza. Il sistem actual da gulivaziun da finanzas è en vigur dapi l'onn 2008. El è vegni elavurà durant divers onns communablamax da la Confederaziun e

dals chantuns ed el è vegnì acceptà dal pievel e dals chantuns cun ina maioritad clera da 64,4 pertschient en la votaziun dals 28 da november 2004 (vesair il quadret 1).

En il curt temp dapi l'introduziun da la gulivaziun da finanzas èn las differenzas pertutgant la forza finanziala dals chantuns sa reducidas, l'autonomia finanziala dals chantuns è vegnida consolidada e la cumpetitivitat fiscalda dals chantuns è sa mantegnida.



2 Las pitgas principales da la gulivaziun naziunala da finanzas



La bása legala da la gulivaziun naziunala da finanzas è francada en la Constituziun federala. Ella vegn concretisada en numerusas disposiziuns legalas. La bása legala per la gulivaziun da finanzas en in senn pli stretg èn la Lescha federala dals 3 d'octobre 2003

davart la gulivaziun da finanzas e la cumpensaziun da grevezzas e l'Ordinaziun dals 7 da november 2007 davart la gulivaziun da finanzas e la cumpensaziun da grevezzas.

Quadret 1:

Pertge hai duvrà in nov sistem per la gulivaziun da finanzas?

Il federalissem è in dals princips centrals da la Constituziun federala svizra che sa manifestescha marcantamain surtut en dus puncts: Per l'ina ha la Svizra cun ses 26 chantuns e cun sias var 2500 vischnancas ina structura territoriala cun unitads magari pitschnas. Per l'autra han ils chantuns e las vischnancas competenzas fitg vastas, per exemplu en furma da l'autonomia finanziala e fiscală.

L'onn 1959 ha il pievel svizzer acceptà l'emprima lescha da gulivaziun da finanzas e stgaffi uschia la basa per transferir daners tenor la forza finanziala dals chantuns. En consequenza èn lura vegnidas calculadas quasi tut las tariffas da subvenziuns federalas d'ina maniera u l'autra tenor la forza finanziala dals chantuns. Quai ha dà fauss impuls e cun l'ir dals onns è sa sviluppà in sistem intranspa-

rent da transfers tranter la Confederaziun, ils chantuns e las assicuranzas socialas. L'effect da gulivaziun dal sistem era daventà intransparent e difficil da controllar politicamain.

La refurma da la gulivaziun da finanzas è stada per motivs da cuntegn e da temp in dals pli gronds projects da refurma en Svizra. Ella cumpiglia tant la repartiziun da las incumbensas tranter ils chantuns e la Confederaziun e quella tranter ils chantuns sco er la gulivaziun da finanzas en in senn pli stretg. Blers acturs han collavurà dapi l'onn 1995 per il project da refurma pertutgant la gulivaziun da finanzas e la repartiziun da las incumbensas tranter la Confederaziun ed ils chantuns (NGF). Il project è vegni realisà suenter che las refurmazas èn entradas en vigur l'onn 2008.

2.1 Tge signifitga la repartiziun da las incumbensas tranter la Confederaziun ed ils chantuns?

La Constituziun federala regla las cumpetenças da la Confederaziun. Il **princip da subsidiaritat** ed il **princip d'equivalenza fiscala** valan per la repartiziun da las cumpetenças tranter la Confederaziun ed ils chantuns. Tuts dus princips èn fixads en la Constituziun. Il princip da subsidiaritat signifitga en il stadi federal che la corporaziun territoriala suordinada duai surpigiliar ina incumbensa sulettamain, sch'igl è cumprovà ch'ella po ademplir quella meglier, quai vul dir cun damain custs e cun dapli qualitat, che la corporaziun territoriala subordinada. Il princip d'equivalenza fiscala signifitga ch'il circul che profita d'ina incumbensa statala sto correspunder al circul che decida e porta ils custs per tala. Quests dus princips èn stads ils elements principals da la nova gulivaziun da finanzas tranter la Confederaziun ed ils chantuns en il rom da las refurmias (vesair il quadret 2).

Il dumber da las **incumbensas communablas** da la Confederaziun e dals chantuns è vegnì reduci considerablamain; 7 da las anteriuras incumbensas communablas èn vegnidás attribuidas cumplettamain a la Confederaziun e 10 als chantuns. Per las 17 incumbensas communablas restantas han ins sviluppà novs instruments da collavuraziun. En il rom da cunvegnas programmaticas fixescha la Confederaziun las directivas strategicas per garantir che las incumbensas vegnian per exemplu ademplidas tenor standards unitars. Ella lascha dentant als chantuns avunda spazi per realisar las incumbensas tenor ils basegnas da lur populaziun. Finalmain datti er incumbensas che pretendan plitost ina collavuraziun interchantunala ch'ina soluziun a nível federal. Tenor la basa legala per la collavuraziun interchantunala cun compensaziun da grevezzas duai vegnir profità meglier surtut da las differenzas da grondezza per ademplir las incumbensas statalas ed i duain vegnir reducids effects territorials externs (uschenumnads spillovers). La Confederaziun ha unicamain ina rolla d'arbitradra.

Quadret 2:

Refurma da la repartiziun da las incumbensas

Repartiziun da las incumbensas e da la responsabludad per lur finanziaziun	Reglamentaziun da la collavurazion per incumbensas communablas	Collavuraziun interchantunala cun compensaziun da grevezzas
<ul style="list-style-type: none"> Incumbensas da la Confederaziun: p.ex. vias naziunalas e defensiun naziunala. Incumbensas dals chantuns: p.ex. chasas per persunas impeditas, scolas publicas, scolas spezialas, stipendis fin il stgalim secundar II. Incumbensas communablas: p.ex. reducziuns da las premias tar l'assicuranza da malsauns, traffic regiunal, vias principalas, protecziun cunter inundaziuns, protecziun da la natira e da la cuntrada. Incumbensas interchantunals: p.ex. universitads chantunals, traffic d'aglomeraziun, gestiun dal rument, sereneras. 	<p>Cunvegnas programmaticas: programs da plirs onns che sa basan sin finamiras e contribuziuns globalas e pauschalas tenor cunvegna. La Confederaziun è cumpeten-ta per la gestiun strategica, ils chantuns han la responsabludad operativa. In controlling consolidà procura che las incumbensas vegnian ademplidas tenor las finamiras definidas. Cunvegna programmaticas èn per exemplu vegnididas definidas cun ils chantuns per las domenas da l'ambient, da la politica regiunal u da la misiraziun uffiziala.</p>	<p>Instituzionalisaziun da la collavuraziun a basa da contracts inter-chantunals. Ils chantuns fan contracts davart il diever comunabel u la producziun communabla da prestaziuns statalas. La Confederaziun ha ina rolla d'arbitradra: Sut tschertas cundizions po ella obligar ils chantuns da collavurar en nov domenas d'incumbensa, sche chantuns interessads pretendan quai. Questa collavuraziun cumpiglia ina compensaziun da las grevezzas. Quai è insatge unic en ils pajais da la OECD. Contracts interchantunals datti per exemplu en las domenas da las universitads e dal traffic d'aglomeraziun.</p>

2.2 Co funcziuna la gulivaziun da finanzas en in senn pli stretg?

Il sistem da gulivaziun è vegnì refurmà cumplettamain cun il project da la NGF. L'effect da gulivaziun è vegnì meglierà ed ils fauss impuls da l'antierur sistem da gulivaziun èn vegnids eliminads. In punct central è stà da substituir las contribuziuns finanzialas liadas a prestaziuns definidas cun contribuziuns betg liadas or da la gulivaziun da resursas ed or da la cumpensaziun da grevezzas. Ils chantuns pon decider sezs, sch'els vulan investir questas contribuziuns finanzialas per diminuir lur daivets, per sbassar las taglias u per finanziar lur incumbensas. Quai rinforza l'autonomia e la responsabladad dals chantuns che pon uschia er investir lur daners tenor ils basegns da la populaziun regiunala. En il sistem vegl survegnivan ils chantuns cun resursas flaiylas e cun ina grevezza fiscale relativamain auta tendenzialmain dapli contribuziuns da gulivaziun che chantuns cun ina grevezza fiscale pli bassa. Per cuntrariar questi


fauss impuls è l'index da la grevezza fiscale vegnì eliminà sco criteri. Per calcular il potenzial da resursas d'in chantun vegnan uschia resguardadas oz mo pli las resursas explotablas fiscalmain d'in chantun, independentamain da la grevezza fiscale effectiva.

La gulivaziun da finanzas en in senn pli stretg cumpiglia trais sistems da gulivaziun. L'onn da referencia 2012 importa l'entir volumen dals trais sistems da gulivaziun 4'676 milliuns francs, finanziads per var 2/3 da la Confederazion (2012: 3'102 milliuns francs) e per 1/3 dals chantuns (1'575 milliuns francs). La gulivaziun da finanzas en in senn pli stretg cumpiglia damai tant ina gulivaziun verticala (q.v.d ina redistribuziun da la Confederazion als chantuns) sco er ina gulivaziun orizontalala (q.v.d ina redistribuziun tranter ils chantuns).


2.2.1 Gulivaziun da resursas: redistribuziun da resursas finanzialas

La gulivaziun da resursas sa basa sin l'uschenumnà potenzial da resursas dals chantuns. Quest potenzial resguarda la creazion da valur dals chantuns che po vegnir explotada fiscalmain e reflectescha uschia la forza economica d'in chantun. El sa cumpona da las entradas e da las facultads suttamessas a la taglia da las persunas naturalas sco er dals gudogns suttamess a la taglia da las persunas giuridicas. Sch'ins cumpareglia il potenzial da resursas per abitant cun la media svizra correspudenta, resulta l'uschenumnà **index da resursas**. Chantuns cun in index da resursas da passa 100 puncts valan sco chantuns cun finanzas fermas e pajan contribuziuns per la gulivaziun da resursas tenor lur forza da resursas e tenor lur dumber d'abitants. Chantuns cun in index da resursas da sut 100 puncts valan sco chantuns cun finanzas flaivlas e survegnan perquai contribuziuns da gulivaziun.


La gulivaziun da resursas vegn finanziada ensemenda la Confederaziun (gulivaziun da resursas verticala) e dals chantuns cun finanzas fermas (gulivaziun da resursas orizontalta). En la Constituziun federala èsi statui che la gulivaziun da resursas orizontalda duaja importar almain $\frac{2}{3}$, dentant maximalmain $\frac{4}{5}$ da la gulivaziun da resursas verticala. Ils pajaments da gulivaziun als chantuns cun finanzas flaivlas vegnan definids uschia ch'ils chantuns ils pli flaivels vegnan favorisads surproporzionalmain. La finamira è che tut ils chantuns hajan in index da resursas d'almain **85 puncts d'index**.



L'index da resursas l'onn 2012



Effect da gulivaziun en la gulivaziun da resursas, index da resursas l'onn 2012 avant e suenter la gulivaziun



2.2.2 Cumpensaziun da grevezzas: contribuziun per grevezzas spezialas

La cumpensaziun da grevezzas distgorgia ils **chantuns da muntogna** ed ils **chantuns urbans** che han per raschuns structuralas dapli expensas per porscher bains e prestaziuns statalas. Ils chantuns da muntogna ston per exemplu surpigiliar dapli custs per l'infrastructura, per il mantegnimente e la rumida da las vias u per las scolarisaziun (p.ex. bus da scola). Ils chantuns urbans han savens ina procentuala surproporzionala da persunas attempadas, da persu-

nas paupras e da persunas estras. Quai pretenda dapli prestaziuns statalas, siond che questas gruppas chaschunan surtut dapli expensas per las ovras socialas e damaian entradas da taglia. Questas grevezzas spezialas n'èn betg adina da metter a pèr cun expensas sur la media ch'in chantun ha en ina domena. Per exemplu pon expensas pli grondas en il champ social reflectar tant grevezzas spezialas sco er differentas preferenzas e decisius politicas dals chantuns concernent ina purschida supplementara.

Delimitaziun da las grevezzas spezialas

Gener da grevezzas	Cumpensaziun
Spillovers Purschida statala d'in chantun, da la qualu pro-fitan er abitantas ed abi-tants d'in autre chantun	Collavuraziun interchantunala cun cumpensaziun da grevezzas
Purschida supplementara Expensas per prestaziuns statalas che surpassan ils basegns da basa	Nagina cumpensaziun
Basegns da basa Expensas per cuvrir il basegn minimal da prestaziuns e da bains statals	Cumpensaziun da grevezzas da la Confederaziun

Dimensiun da las prestaziuns per abitant

Contribuziuns per grevezzas spezialas vegnan pajadas per l'ina en il rom da la compensaziun da grevezzas geografic-topograficas (CGG) e per l'autra

en il rom da la compensaziun da grevezzas socio-demograficas (CGS). Las grevezzas spezialas vegnan calculadas a basa d'indicaturs mesirabels e definids exactamain.


Indicaturs da la compensaziun da grevezzas

CGG	CGS
<ul style="list-style-type: none">• autezza media• stippezza dal terren• structura d'abitadis• pitschna spesezza da la populaziun	<ul style="list-style-type: none">• paupradad• vegliadetgna• integraziun da persunas estras• indicatur d'urbanitad

La compensaziun da grevezzas vegn finanziada entiramain da la Confederaziun. La dotaziun vegn savens repartida per la mitad sin la CGG e per la mitad sin la CGS.

2.2.3 Cumpensaziun limitada d'inequalitat: contribuziuns durant la perioda transitorica

Ina cumpensaziun limitada d'inequalitat mitgescha las consequenzas da l'introducziun dal nov sistem durant ina perioda transitorica ed impedescha che chantuns cun resursas flaivlas vegnian dischavantagiads tras la midada. Per la cumpensaziun limitada d'inequalitat stattan a disposiziun totalmain 366 milliuns francs che vegnan finanziauds per dus terzs da la Confederaziun e per in terz dals chantuns, en proporziun da lur populaziun. Ella resta constanta fin l'onn 2015, vegn lura diminuida mint'onn per 5 pertschient da l'import oriund e chala l'onn 2036.




2.3 Il percursor da las finanzas en ils trais sistems da gulivaziun

A basa dals resultats dal Rapport federal davart l'efficacitad da la NGF definescha il parlament mintga quatter onns l'import da las contribuziuns da la Confederaziun e dals chantuns per la proxima perioda da quatter onns. Questa regulaziun garantescha ch'il sistem da gulivaziun restia politicamain controllabel. Il Cussegl federal adatescha ils pajaments per ils trais onns sustants. La cuntuaziun da la gulivaziun da resursas s'orientescha al svilup dal potenzial da resursas, la cuntuaziun da la cumpensaziun da grevezzas sa drizza tenor la chareschia.

Il percursor da las finanzas, sco exempl vala l'onn da referencia 2012

en miu. francs



3 L'effect durant ils emprims onns

Il Cussegli federal preschenta mintga quatter onns a l'Assamblea federala in rapport davart la realisaziun e davart l'efficacitad dal nov sistem. Il rapport analisescha schebain e co che las finamiras èn vegnidas cuntanschidas en la perioda passada ed el preschenta mesiras pussaivlas per la perioda vegninta. L'emprim **rapport d'efficacitad** cumpligia la perioda 2008–2011. La perioda evaluada è damai stada fitg curta e perquai n'èsi betg stà pussaivel da far in'analisa cumplexiva da la realisaziun e da l'efficacitad da la gulivaziun da finanzas. Ils resultats principals da l'emprim rapport d'efficacitad èn ils sustants:

- *L'autonomia finanziala dals chantuns è vegnida rinforzada:*
La quota dals transfers da daners liads a prestaziuns definidas tranter la Confederaziun ed ils chantuns ha pudì vegnir diminuida fermemain grazia a l'introducziun da la nova gulivaziun da finanzas. La quota dals transfers da daners betg liads a prestaziuns definidas ha pudì vegnir augmentada. Per consequenza stattan oz a disposiziun als chantuns bler dapli daners dals quals els pon disponer libramain ch'avant l'onn 2008.

- *Las differenzas pertutgant la forza finanziala dals chantuns è sa diminuida:*
La gulivaziun da resursas ha reduci las disparitads tranter ils chantuns cun bleras resursas ed ils chantuns cun paucas resursas.
- *La competitivitat fiscalda dals chantuns è sa mantegnida:*
La competitivitat fiscalda da la Svizra e dals chantuns è restada fitg auta tant areguard las taglias sin las interpresas sco er areguard las taglias sin las entradas. Ils chantuns cun bleras resursas han pudì mantegnair u sbassar vinavant lur tariffa da taglia, malgrà las expensas per la nova gulivaziun da finanzas. La finamira da mantegnair tariffas da taglia competitivas a nivel naziunal ed internaziunal è vegnida cuntanschida.
- *Ina basa minimala da resursas finanzialas è restada garantida:*
Dapi l'introducziun da la nova gulivaziun da finanzas l'onn 2008 è vegnida cuntanschida – er grazia a la compensaziun limitada d'inequalitat – per gronda part la finamira da furmar or d'agens medis finanzials ina reserva da resursas per persuna dad 85 pertschient da la media svizra.

- Grevezzas geografic-topograficas e socio-demograficas exageradas èn vegnidas cumpensadas: Grazia a la cumpensaziun da las grevezzas tras la Confederaziun han ins pudi recumpensar en media 12 pertschient da las grevezzas spezialas constatadas. La cumpensaziun è stada procentualmain pli gronda tar la CGG che tar la CGS. Cunquai che la relazion na s'è betg midada fundamentalmain cun l'introduziun dal nov sistem, è vegnì decis da cuntinuar er en la nova perioda da quatter onns 2012–2015 cun ina dotaziun da la mitad per mintgin dals dus tips da grevezzas.
- *La cumpensaziun interchantunala da grevezzas è vegnida realisada adequatamain:*
Perquai ch'i mancan datas statisticas na pon ins actualmain betg anc mesirar en cifras la cumpensaziun interchantunala da grevezzas. Evaluaziuns qualitativas demussan dentant che la finamira da rinforzar la collavuraziun interchantunala cun la cumpensaziun da grevezzas vegn realisada.

Contact:

Communicaziun
Administraziun federala da finanzas AFF
Bundesgasse 3
3003 Berna
kommunikation@efv.admin.ch
Tel.: +41 31 325 16 06

Datas actualas:

Tabellas cun datas actualas chattan ins en l'internet.

Infurmaziuns:

www.efv.admin.ch/finanzausgleich

Spediziun:

www.bundespublikationen.admin.ch

Nr. d'empustaziun: 601.010.Rg

Illustraziuns:

Johanna Schaible & Dimitra Charamanda

Translaziun:

Chanzlia federala

